

SKIPULAGSSKRÁ

fyrir Tónlistarskólann í Reykjavík.

1. gr.

Stofnunin er sjálfseignarstofnun og heitir Tónlistarskólinn í Reykjavík, kt. 660269-0379. Heimili og varnarþing er í Reykjavík.

2. gr.

Tónlistarfélagið í Reykjavík er stofnandi stofnunarinnar. Félagið stofnaði Tónlistarskólann í Reykjavík 1930 og er skólinn elsti starfandi tónlistarskóli landsins.

3. gr.

Markmið stofnunarinnar er rekstur tónlistarskóla:

- a) sem veitir efnilegum nemendum staðgóða og alhliða tónlistarmenntun og býr þá undir störf tónlistarmanna og tónlistarkennara.
- b) sem stuðlar að viðtækri almennri tónmennt í landinu.

Lokapróf frá skólanum eru burtfarapróf í hljóðfæraleik og söng, einsöngvarapróf og kennarapróf í hljóðfæraleik og söng, og tónmenntakennarapróf og lokapróf frá tónfræðadeild.

4. gr.

Tekjur Tónlistarskólans í Reykjavík byggjast á fjárveitingum opinberra aðila svo sem Reykjavíkurborgar og ríkissjóðs með hliðsjón af lögum nr. 75/1985 um fjárhagslegan stuðning við tónlistarskóla. Jafnframt innheimtir stofnunin skólagjöld af nemendum skólans til að standa að öðru leyti undir kostnaði af rekstri hans, ásamt með öðrum tekjum sem skólanum kunna að áskotnast.

5. gr.

Eignir stofnunarinnar eru stofnfé hennar kr. 500.000, sem er framlag Tónlistarfélagsins í Reykjavík og síðari arður af því. Ennfremur þær eignir sem stofnunin á og síðar kann að eignast fyrir framlög, gjafir og styrktarfé eða á annan hátt.

Stofnfé stofnunarinnar má ekki skerða.

Peningar þeir sem stofnunin á eða eignast, skulu jafnóðum ávaxtaðir í bönkum, sparisjóðum eða ríkistryggðum skuldabréfum.

Ekki má selja eða láta af hendi stofnunina eða eignir hennar fastar eða lausar nema andvirðinu sé beinlínis varið í samræmi við markmið hennar og tilgang samkvæmt 3. gr. sbr. þó 11. gr. Eigi má heldur binda fé hennar eða eignir nokkrum veðböndum eða skuldbindingum, sem eru óviðkomandi tilgangi skólans.

6. gr.

Með málefni stofnunarinnar fer stjórn, hér eftir nefnd skólanefnd, sem skipuð er fimm mönnum og jafnmörgum varamönnum. Kjörtímabil skólanefndarmanna er fjögur ár. Skólanefnd Tónlistarskólans í Reykjavík er skipuð sem hér segir: Stjórn Tónlistarfélagsins í Reykjavík tilnefnir þrjá fulltrúa, borgarstjórinn í Reykjavík og menntamálaráðherra tilnefna einn skólanefndarmann hvor. Varamenn skulu skipaðir með sama hætti. Formaður skólanefndar og varaformaður skulu tilnefndir af Tónlistarfélaginu í Reykjavík. Einfaldur meirihluti ræður ákvörðunum skólanefndar.

7. gr.

Skólanefndin ber ábyrgð á starfi skólans, rekstri, fjárhag og eignum og stjórnar mál-efnum stofnunarinnar í samræmi við skipulagsskrá þessa og lög og reglur er varða starfsemi hennar að öðru leyti.

Skólanefndin ræður skólastjóra Tónlistarskólans í Reykjavík.

Skólanefnd ákveður starfstilhögun og fræðslustefnu skólans að fengnum tillögum skólastjóra. Nefndin tekur og ákvarðanir um húsnæði fyrir skólann.

Skólanefndin ákveður útgjöld skólans, setur reglur um kennslu í skólanum, ákveður fjölda stöðugilda fyrir fastakennara og úthlutar styrkjum og verðlaunum til nemenda, allt að fengnum tillögum frá skólastjóra. Að fengnum tillögum skólastjóra ákveður skólanefnd skólagjöld nemenda og aðstoðar skólastjóra við fjáröflun og fjárfestingar fyrir skólann.

8. gr.

Skólastjóri annast daglegan rekstur og stjórn skólans í umboði skólanefndar og ber ábyrgð gagnvart henni. Skólastjóri er ábyrgur fyrir að starfstilhögun skólans sé í samræmi við hlutverk hans, markmið og gæðakröfur m.a. hvað varðar námsskrá og kennslufyrirkomulag. Hann framfylgir samþykktum skólanefndar og kemur fram fyrir hönd skólans gagnvart starfsmönnum, nemendum og aðilum utan skólans. Skólastjóri gerir drög að fjárhagsáætlun skólans og leggur fyrir skólanefnd. Hann ákveður stundaskrár, annast starfsemi skólans og semur skýrslu yfir hana að liðnu hverju skólaári. Skólastjóri ræður kennara og annað starfsfólk að fengnum samþykki skólanefndar.

9. gr.

Rekstrarár stofnunarinnar er frá 1. ágúst til 31. júlí.

Skólanefnd skal sjá um að gerður sé reikningur yfir rekstur og efnahag stofnunarinnar. Skal reikningurinn endurskoðaður af löggiltum endurskoðanda sem skólanefnd ræður til starfsins. Sérstakur starfsmaður, ráðinn af skólanefnd, annast reikningsfærslur og gjaldkera-störf fyrir skólann.

Skólastjóri skal fyrir 30. júní ár hvert leggja rekstraráætlun næsta rekstrarárs fyrir skólanefnd til afgreiðslu.

Fyrir 30. júní ár hvert skal skólastjóri leggja fyrir skólanefnd skýrslu með yfirliti yfir rekstur skólans fyrir liðið rekstrarár og skilagrein um eignir hans og sjóði þá sem honum tilheyra.

Reikningar stofnunarinnar skulu sendir borgarendurskoðun og Ríkisendurskoðun fyrir 30. júní ár hvert fyrir næstliðið ár ásamt skýrslu um ráðstöfun fjármuna hennar það ár sbr. 1. mgr. 3. gr. laga um sjóði og stofnanir sem starfa samkvæmt staðfestri skipulagsskrá nr. 19/1988.

10. gr.

Skólanefnd getur með samhljóða samþykkt breytt skipulagsskrá þessari, að fengnum tillögum frá skólastjóra og Tónlistarfélaginu í Reykjavík.

11. gr.

Verði Tónlistarskólinn í Reykjavík lagður niður sem sjálfseignarstofnun skal Reykjavíkurborg taka við eignum hans og skuldum og hagnýta þær í þágu tónlistarfræðslu í borginni.

12. gr.

Leita skal staðfestingar dómsmálaráðherra á skipulagsskrá þessari og hún birt í B-deild Stjórnartíðinda.

Reykjavík, apríl 1997.

F.h. Tónlistarfélagsins í Reykjavík,

Baldvin Tryggvason, formaður, fulltrúi Tónlistarfélagsins í Reykjavík

Rut Ingólfssdóttir, fulltrúi borgarstjórans í Reykjavík

Þráinn Þorvaldsson, fulltrúi menntamálaráðherra

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 17. febrúar 1998.

F. h. r.

Jón Thors.

Fanney Óskarsdóttir.

3. mars 1998

Nr. 143

GJALDSKRÁ

fyrir sorphirðu í Neskaupstað árið 1998.

1. gr.

Bæjarstjórn Neskaupstaðar er heimilt að leggja á sérstakt sorphirðugjald (sorphreinsi- og sorpeyðingargjald) árið 1998 sem innheimta skal með fasteignagjöldum.

2. gr.

Gjaldið er sem hér greinir:

Sorphreinsunargjald	4 500 kr. á hverja tunnu.
Sorpeyðingargjald	3 500 kr. á hverja tunnu.

3. gr.

Gjaldskrá þessi, sem er samþykkt af bæjarstjórn Neskaupstaðar, er hér með staðfest samkvæmt 18. gr. laga nr. 81/1988 um hollustuhætti og heilbrigðiseftirlit, með síðari breytingum til að gilda fyrir árið 1998.

Umhverfissráðuneytinu, 3. mars 1998.

F. h. r.

Ingimar Sigurðsson.

Sigurbjörg Sæmundsdóttir.